

«Idols e colliaziuns èn essenzialas»

«Pervia da la pandemia han la Sessiun da giuvenils e las partidas giuvnas gì difficultads da promover la generaziun giuvna», di Barbara Wülser, manadra dal Post da stab per l'egualitad da las schanzas. Perquai saja ussa in bun mument per organisar ina segunda occurrenza che s'adresa a dunnas giuvnas.

LAURA SCHÜTZ/FMR

Questa saira ha lieu a Cuir in'occurrenza – organisada dal Post da stab per l'egualitad da las schanzas e da la Sessiun dals giuvenils dal Grischun – per dunnas giuvnas da 13 fin 30 onns.

FMR: Vossa finamira è da motivar dunnas giuvnas interessadas da s'engaschar politicamain. Pertge dovri ina tala occurrenza?

Barbara Wülser: «Dapi onns stagnescha la procentuala da las dunnas engaschadas politicamain tar circa 20% en il Grischun. Tenor gremi variescha quai: Entant ch'i dat bleras represchentantas en uffizis da scola, datti strusch presidentas communalas u represchentantas en cumissiuns da gestiun. Savens fiss l'interess qua, ma quel na vegn betg persequità vinavant. Che nus avain in basegn da cumpensaziun ma mussan las cifras e mias atgnas observaziuns. Dunnas na fan betg meglra politica ch'umens, ma igl è impurtant che l'entira populaziun saja represchentada.»

Dapi onns datti mesiras da promoziun. Pertge na vegni betg meglia?

«In motiv è la cumpatibilitad da la professiun, la politica e la famiglia. Quella vegn influenzada da l'equiliber en partenadis. En la politica è la cumpatibilitad spezialmain greva pervia da las structuradas, cunquai ch'i dat per exempel bleras sesidas dasper il temp da lavur. La definiziun da l'atgna rolla sociala ha era ina gronda muntada. Savens s'engaschan dunnas plitost en moviments, en gruppas, per exempel tar la chauma da las dunnas. I dovra curaschi d'entrar en in gremi d'umens. Studis mussan che dunnas che s'exponan, vegnan plitost attatgadas pervia da lur schlattaina. Politicras n'èn ultra da quai betg uschè preschentadas en las medias sco politicchers. Maletgs vegnan reproducids. Uschia vegn dà in signal a la gliעד ch'ina politicra na correspundia betg a la norma. La finala vai era per pussanza, da la quala savens umens stuessan renunziar en quest cas. Tgi è però pront da desister da quella?»



Barbara Wülser, manadra dal Post da stab per l'egualitad da las schanzas. FOTO MAD

Exista il privel che l'occurrentza cuntanscha cunzunt dunnas gia sensibilizadas?

«Nus ans essan conscients/as che quella s'adressa cunzunt a mattas bain scoladas. Sche quellas giuvnas san dentant ch'ellas represchantan ils giavischs da lur generaziun, pon ellas agir sco portavusch per persunas main scoladas. Al parlament da mattas avain nus remartgà che p.ex. mattas da las vals da lingua taliana sa sentan savens isoladas. Persunas bilinguas pon construir punts tranter differentas regiuns. Igl è ultra da quai impurtant che la furmaziun politica cumenzia gia baud, en cas ideal en famiglia. Las scoladas pon egualisar las situaziuns da partenza.»

Datti en il spectrum politic grondas differenzas pertutgant la represchantanza da dunnas?

«Jau crai che la conscienza dal problem na saja betg tar tut las partidas medem gronda. Gronda paisa sin la promoziun da las dunnas mettan surtut la Verda e la PS, i daventa era tar las autras partidas plaunsieu in tema. *Eveline Widmer Schlumpfe* e *Brigitta Gadiant* èn per exempel precursuras da partidas burgaisas. Tar l'occurrenza da questa saira avain nus aposta envidà era umens giuvens da las partidas giuvnas e da la sessiun dals giuvenils, per accentuar la diversidad ed ils giavischs communabels. Tut las partidas giuvnas, cun excepziun da la Giuvna PPS che n'era betg interessada da sa participar, èn represchentadas.»

L'onn 2012 ha il parlament da mattas gì lieu per l'emprima giada, il fratemp gia quatter giadas. Tge connex ha quel cun questa occurrenza?

«Il parlament da mattas sa drizza a giuvnas da 13 fin 16 onns. A quel vegn fatg attent tras las scolas. Per bleras è quel l'emprim contact cun la politica. L'event da questa saira duess ir in pass vinavant. Qua vulain nus mussar tge pussaivladads ch'i dat da s'engaschar e da sa colliar. I duess vegnir visibel ch'i dat idols, dunnas giuvnas activas sco «ti ed jau». Da quellas experientschas pon far curaschi.

L'occurrenza publica «Politicras giuvnas: Entrai per plaschair!» è a las 17.00–20.15 en la Biblioteca da la citad da Cuir. Dunnas giuvnas pon s'informar davart las pussaivladads da la participaziun politica e sa barattar cun politicras e cun activistas.